



GETARIAKO KETA

ESKAINITZA ZABALDU, ILUSIOAK BERRITU

Hamarkada bat baino gehiago da —hamahirugarren denboraldia du— Getariako Ketak futbolean aritzeko aukera herrira ekarri zuela. Denboraldi honetan hiru kirol modalitate berri hartu ditu bere baitan: kirol egokitua, areto futbola eta saskibaloia. Nahi duen orori kirola egiteko aukera eskaintzea du helburu, losu Mugikaren esanetan. Okasio hori baliatu du, besteak beste, Gari Manterola getariarrak.

TESTUA
IURE EIZAGIRRE

Egun klubeko kirolean ibili ez arren, Ketako aurpeirik ezagunenetakoa da Iosu Mugikarena. Edozer behar dela ere, han dago; hargatik, lehen eskutik azaldu dizkigu Ketaren barruan izandako azken aldaketak.

Klubean hiru kirol modalitate berri sartu dira aurten. Nola sortu da horretarako aukera?

Egoera ezberdinekin egin dugu topo. Iruditzen zitzaigun bagenuela hasiera ematea orain arte landu gabe zeuden arloei. Kirol egokitan genuen gogoia; bigarrena, saskibaloia, sorpresaz etorri zen; eta hirugarrena, areto futbola, berriro aktibatuta da.

Udan saskibaloia talde bat —Sharks— etorri zitzaigun Zarauztik laguntza eske. Bazuten kirol azpiegitura, jokalarikopuru jakin batekin, eta horrek erakarri gintuen, kirol arloa martxan izanda errazagoa delako.

Areto futbolari dagokionez, berriaz, azken hiru urteetan eduki dugu jubenil mailako futbol hamaikako talde federatua. Abuztuaren bukaeran jakin genuen ez zela aterako; horri irtenbide bat emate aldera, aukera eman dugu areto futboleko taldea sortzeko.

Horren atzean burokrasia asko dago, ondorioz, eskari ezberdinak egin behar dira, estatutuak aldatu, kudeaketa... Gero horiek martxan jartzeko beraien denbora behar dute, hiruzpalau hilabete inguru.

Zein helbururekin sartu dira kirol berriak?

Herrian aukera ezberdin bat ematekoa. Keta ez da sortu futbola bakarrik lantzeko. Hasiera batean horrekin lotuta zegoen baina bere garaian xakearekin

IOSU MUGIKA

"ANTOLAKUNTZA ETA ERANTZUKIZUNA BADA, EDOZERI IREKITA GAUDE"



Iosu Mugika Ketako ordezkaria eta areto futboleko entrenatzailea.

saiatu ginen, orain hauekin. Kirola sustatzearen alde egin dugu.

Zer behar ekarri ditu horrek?

Behar berriak baino gehiago, gertatzen zaiguna da saskibaloian ez dagoela azpiegiturarik, adibidez. Orduan saskiak, ekipamendu berria, epaileak... ekonomikoki ahalegina eskatzen duten gauza asko behar dira. Horri buelta emateko bazkidetza gehiago eskatu da jokalariko.

Saskibaloia taldeari eskatu dioguna izan da, gutxienez, lau urtez gurekin geratzeko; nahiz eta aurten etorri eta gerora gauzak konpon daitezkeen, gurekin egoteko konpromisoa hartu dute. Horrela, orain egiten den inbertsioa amortizatuta ahal izango dugu epe horretan.

Urte txarra izango da ekonomikoki, oso sufritua, baina iruditzen zaigu buelta emateko gai

izango garela kontuan hartuta konpromiso hori badagoela.

Taldeei begiratuta, zeu zara areto futbolekoaren entrenatzailea. Ezberdinak dira hamaikako futbola edo aretokoa, nola dabilta jokalariek?

Ikusten da oraindik egonkortzeko gaudela. Ez du ematen baloi baten atzetik goazelako, baina dena ezberdina da.

Askoz aktiboagoa da areto futbola, metro gutxitan jokatuta, asko sufritzen da. Hamaikako futbola askoz patxadatsuagoa, landuagoa, da. Han nahiz eta norbaitek aurrean huts egin, atzean jendea geratzen zaizu; hemen, berriz, aurrean edo edozein lekutan huts eginez gero, bestaldean dituzu berehala. Oraindik ohitu egin behar dugu.

Etxeko partidak kiroldegian jokatzeko dituzte taldeak. Nolakoa?

harrera izan du herritarren aldetik?

Ikusi da jendeak gogoia daukala. Federatutako gure hamaikako futbolari zelaia falta zaio, eta taldeari bere jarraitzaileek gehiago babestea, nahiz eta daukagunarekin oso gustura gauden. Ezberdina da egoera, jendea edozein aitzakiarekin kiroldegian dagoelako bi minututan.

Aurreneko partida pixka bat eroa izan zen: nahiz eta saiatu jokalariei esaten zer egin behar genuen, ez zegoen entzungo zuenik. Jendeak oso ondo hartu du taldea.

Bere garaian ere halaxe zen, areto futboleko taldeak lehen ere jende asko mugitzen zuen. Berriz areto futbola aktibatzeak suposatzen dut haiei ere ilusioa egingo ziela.

Datorren urtean jokalar gehiago balira, hamaikako futbolera itzuliko litzateke taldea?

Aurreikusita daukaguna da, oraingoz behintzat, urtebeterako proiektua izatea. Ez dugu

nahi jarraitzeko prest zeuden 11 jokariak urtebetea kirol ekintzarik gabe egoterik.

Orain jubenilak dira, datorren urtean seniorrak; goiko taldeari jarraipena emateko ezinbestekoa da hauek zaintzea. Bestalde, beraiek badakite urtebeteko proiektua dela.

Jubenilak izaten jarraitzen dutenekin landu beharko dugu urtearen hasieratik badagoen taldearekin bat egiteko asmorik; baina ahal bada, berriro ere hamaikako futboleko taldea izatea da helburua.

Saskibaloia helduta, Getaria Keta Babyauto Sharks nahiko talde autonomoa omen da.

Bai, nahiz eta orain arte klub baten barruan egon, beti funtzionatu dute beraien antolaketa propioarekin. Hori errespetatu egingo diegu baina eman dizkiegu irizpide batzuk elkarlana izan dadin: beraiek eramango dute entrenatzailearen kudeaketa, lekualdaketa, kirol kudeaketa. Zuzendaritza, ezkutu eta herri bat ordezkatzeko dutenez, eskatu zaie bederatzi hilabeteko konpromisoa, eta ahal den egokien hasi eta buka dezatela, kamiseta sentituz.

Orain arte ez da saskibalo talderik izan herrian, zer ekar dezake honek?

Kirol modalitate berria izateak aukera bat gehiago izatea dakar. Inor zalantzan egon bada, bertatik bertara izatea probatzeko aukera, erakargarriagoa izaten da eta errazago eman daiteke pausoa.

Lortu dugu norbaiti gogoia sortzea eta dagoeneko taldearekin bat egin du getariar batek. Guretzat oso garrantzitsua da bat egite hori.

Kirol egokituari zer asmo duzue?

Gorka Uzkudun taldekideak istripu handia izan zuen duela urte batzuk eta esan genion kirol bat egiteko gai bazen, federatuko genuela. Lan ikargarria egin du eta guk hitza betekiko dugu; txirrindularitza eta atletismoan ariko da.

Horrez gain, udako pozetako bat izan da getariar batek kirol egokituari parte hartzea. Irati Idiakezek bat egin du gurekin eta neguko kirolean hartuko du parte, snow atalean —denboraldia hurbildu ahala ARTZAPEN izango duzue horren berri—. Erregistroa egina dago eta espero dugu gozatuko duela berak nahi duen bezala, beti ere gure babesarekin.

Aldaketa hauekin, badirudi edozeri irekita zaudetela.

Atzetik antolakuntza ona eta erantzukizuna badago, beti ere. Azken finean lan asko eta ordu pila bat daude ikusten ez direnak, eskertzen ez direnak, eta inoiz eskertuko ez direnak, baina ikustea talde edo lagun taldeak daudela kirol ezberdinek egiten, astebururo bederatzi hilabetetan, eta pixka bat lehenago antolatzen... Gauza horiek bete egiten zaituzte.



Areto futboleko taldea Getarian jokotutako azken partidari.

Txikitatik du gustuko saskibaloia
Gari Manterola gazte
getariarrak. Hamar urtez
Zarautzen jokatu ondoren,
utzi egin zuen lana tarteko.
Ketak bere baitan hartu duen
taldean berriro bere zaletasunaz
gozatzeko aukera du.

**Heldu berria zara Getariako
Keta Babyauto Sharks taldera,
nolakoa izan da hasiera?**

Keta futbol taldearen bidez jakin
nuen Sharks klubean sartu zela.
Beraiek deitu zidaten taldean
getariar bat izateko interesa
zutela esanez, eta hamar urtez
ibili eta gero, gogoa piztu
zidan Sharksen sartzeak.

Beraiekin hitz eginda, telefonoz,
harrera zoragarria egin zidaten.
Taldeen ere beste bat bezala
tratatu naute, getariarra izanda
ere, Zarauzkoa banintz bezala.

**Aurretik ibilia zara, noiztik duzu
zaletasuna?**

Oso txikitatik, futbola aukeratu
beharrean, saskibaloia aukeratu
nuen. 9-10 urterekin Zarautzera
joan behar izan nuen.

Zer zekarren horrek?

Herrian ni bakarrik ibiltzen
nintzen saskibaloian, amaren
beharra izan dut beti. Ez da
futbolekin bezala, han talde bat
dago. Ni bakarrik nintzen eta
amak eraman eta ekartzen ninduen
egunero. Bera egon izan ez balitz,
uste dut zaila izango nukeela
segida ematea saskibaloian.

**Sharks taldea ere handik dator.
Bazenuen harremanik beraiekin?**

Bai, lehen ere ezagutzen nituen,
orain utzita daude gehienak eta
gazteagoak hasi dira. Idatzi
zidana ere nirekin ibilitakoa zen.

**Esaten da Sharksen
ezaugarrietako bat dela lagun
taldea osatzea. Hala bizi duzu?**

GARI MANTEROLA

"BADAGO GOGOA ZER SENTSAZIO ERAGITEN DUGUN IKUSTEKO"



Gari Manterola, Sharks saskibaloia taldeko jokalaria.

Bai, lehen partidaxka jokatu
genuenetik, Debatik. Bukatu eta
gero garagardoak edatera joan
ginen, pintxo batzuk jan...

Nola antolatzen zarete?

Entrenatzailerik ez dago baina
bai entrenatzaile-jokalari bat,
aktak-eta betetzeko. Sistema
bat edo beste ere baditu
antolatuta baina helburua
da bakoitzak bere minutuak
jokatzea. Denok berdintsu
egiten dugu, ez ditu batek 30
minutu eta besteak 5 jokatzen.

Ohiko entrenatzaile batek taldeko
bost onenak erabiltzen ditu, bada,
hemen denok dena jokatzen
dugu; horrek egiten du taldea.

Nola hasi duzue denboraldia?

Irabazten hasi ginen, batere
entrenatu gabe, gainera. Izan
ere, ez dago lekurik entrenatzeko,
saskien zain gaude. Hala ere,
nahiko txukun ibili ginen.

Saskiak azaroan helduko dira.

Bai, azarorako espero dira. Lehen
laupabost partidak kanpoan
jokatuko ditugu eta gero kanpoan
eta Getarian —azaroaren 17ko
asteburutik aurrera— hasiko gara.

Nolako harrera espero duzue?

Aurreneko partidarako badago
gogoa zer sentrazio eragiten
dugun-edo ikusteko. Kirol berri
bat da herrian eta lehen partidari
uste dut jendea azalduko dela,
gero ez dakit zer izango den.

**Zure esperientziatik, zer ekarriko
dio herriari saskibaloia taldeak?**

Gazteei piztu diezaietke zerbait,
inoiz ez dutelako ikusi herrian
bertan jokatzen. Egia esan, herri
txiki honentzako beste talde bat
ateratzea oso zaila iruditzen zait.
Gero, agian, baliteke Zarauzko
jendearekin batu eta bigarren bat
sortzea. Hala ere, gerta daiteke
lehen baino gehiago gustatzea;
uste dut jendea animatuko dela.